



Informe de legalidade sobre o proxecto de orde pola que se amplia a relación de materias optativas do bacharelato e se establece o seu currículo.

De conformidade co disposto no artigo 43.2 da Lei 16/2010, do 17 de decembro, de organización e funcionamento da Administración xeral e do sector público de Galicia, emito o seguinte

INFORME

1. Marco normativo e competencial

O marco xurídico competencial que atribúe aos órganos da Consellería de Cultura, Educación, Formación Profesional e Universidades a elaboración da presente norma parte do artigo 31 do Estatuto de Autonomía de Galicia, consonte o cal é da competencia plena da Comunidade Autónoma galega a regulación e administración do ensino en toda a súa extensión, niveis e graos, modalidades e especialidades, no ámbito das súas competencias, sen prexuízo do disposto no artigo 27 da Constitución e nas leis orgánicas que, conforme ao apartado primeiro do seu artigo 81 o desenvolvan, das facultades que lle atribúe ao Estado o número 30 do apartado 1 do artigo 149 da Constitución, e da alta inspección necesaria para o seu cumprimento e garantía.

O Decreto 119/2022, do 23 de xuño, polo que se establece a estrutura orgánica da Consellería de Cultura, Educación, Formación Profesional e Universidades dispón no seu artigo 1 que lle corresponden a esta consellería, entre outras competencias e funcións, a planificación, regulación e administración do ensino regrado en toda a súa extensión, niveis, graos, modalidades e especialidades, e a coordinación do sistema universitario, de conformidade co establecido na Lei orgánica 1/1981, do 6 de abril, pola que se aproba o Estatuto de autonomía de Galicia, nas leis orgánicas reguladoras do sistema educativo español e demais normativa de aplicación.

A Lei orgánica 2/2006, do 3 de maio, de educación, na redacción dada pola Lei orgánica 3/2020, do 20 de decembro, establece no seu artigo 34.7 que lle corresponde ás administracións educativas ordenación das materias optativas.

Así mesmo, o Real decreto 243/2022, de 5 de abril, polo que se establece a ordenación e as ensinanzas mínimas do bacharelato, determina no seu artigo 14 que corresponde ás administracións educativas regular a oferta destas materias optativas que deberá incluír, polo menos, unha segunda lingua estranxeira.

O Decreto 157/2022, do 15 de setembro, polo que se establecen a ordenación e o currículo do bacharelato na Comunidade Autónoma de Galicia, determina no seu artigo 10.7 que todo o alumnado do primeiro curso do bacharelato debe cursar unha materia optativa, e no seu artigo 11.7, que todo o alumnado do segundo curso do bacharelato debe cursar unha materia optativa. Tamén establece que a consellería con competencias en materia de educación establecerá o currículo desas materias optativas.





Con posterioridade, determinouse a necesidade de modificar o dito decreto para poder ampliar a oferta de materias optativas ás que se refire o citado artigo 10.7, así como a de establecer os seus currículos.

2. Necesidade e oportunidade

Co actual desenvolvemento curricular en materia educativa, preséntaselle á nosa Comunidade Autónoma un importante desafío pero tamén unha grande oportunidade para acometer os cambios precisos de cara a que a estrutura curricular do sistema educativo galego se adapte aos requirimentos normativos estatais e, ao mesmo tempo, se sitúe un paso por diante das necesidades que demanda a nosa sociedade, presentes e futuras conforme ás directrices determinadas pola Unión Europea e pola UNESCO para a década 2020-2030.

Neste caso concreto, a realidade do mundo actual parece facer preciso que o alumnado galego, en relación á intelixencia artificial, avance na transformación dixital coa incorporación de novas estratexias docentes e técnicas pedagóxicas que permitan abordar os retos tecnolóxicos de futuro. Por iso, un obxectivo primordial é o de que o alumnado, con independencia de cales sexan os seus estudos posteriores, comprenda os sistemas baseados na intelixencia artificial, que sea capaz de desenvolver solucións a problemas concretos empregando as ferramentas dispoñibles e que reflexione como parte da nosa sociedade na repercusión da intelixencia artificial na vida como cidadáns.

O sistema educativo galego non pode permanecer alleo á importancia para a formación integral da mocidade galega do eido da intelixencia artificial, polo que pretende dar resposta a esta necesidade mediante a creación dunha nova materia sobre este tema.

Esta ampliación da oferta realízase ao abeiro da disposición derradeira segunda do Decreto 157/2022, do 15 de setembro, que faculta a persoa titular da consellería con competencias en materia de educación para ditar as disposicións precisas no relativo á organización e materias propias do seu departamento, e ao desenvolvemento de dito decreto.

En consecuencia, o obxectivo desta orde é ampliar a oferta de materias optativas do bacharelato, así como aprobar o currículo da materia de Tecnoloxías Intelixentes, que se ofertará como optativa para no primeiro curso do bacharelato.

3. Tramitación

A Lei 16/2010, do 17 de decembro, establece no capítulo II do seu título II o procedemento de elaboración de disposicións administrativas de carácter xeral. O artigo 41 regula a fase inicial e sinala que a elaboración das devanditas disposicións iniciárase por acordo da persoa titular da consellería na que se encadre o centro directivo que tivese a iniciativa. Así, o presente proxecto de orde foi elaborado como anteproxecto pola Dirección Xeral de Ordenación e Innovación Educativa. A documentación achegada nesta fase foi a seguinte:

- Acordo do conselleiro de Cultura, Educación, Formación Profesional e Universidades de 31 de marzo de 2023, de inicio do procedemento de elaboración da norma.
- Texto do anteproxecto.

Consellería de Cultura, Educación, Formación Profesional e Universidades
Secretaría Xeral Técnica
Edificio Administrativo San Caetano, nº 2, baixo
15781 Santiago de Compostela (A Coruña)





- Memoria xustificativa sobre a súa legalidade, acerto e oportunidade.
- Memoria económico-financeira.
- Táboa de vixencias.
- Informe do Servizo Técnico-Xurídico de data 31 de maio de 2023

De acordo co artigo 41.2 da citada lei, o texto da proposta normativa expúxose publicamente na fase "Consultas abertas" da sección "Consulta pública previa" do Portal de Transparencia e Goberno Aberto durante o período comprendido entre o 3/04/2023 e o 17/04/2023., e se recibiron nese prazo 101 achegas/opiniós a través do formulario dispoñible no propio portal.

Logo de finalizar esta fase do procedemento mediante a aprobación inicial do texto como proxecto de orde polo conselleiro de Cultura, Educación, Formación Profesional e Universidades, o 5 de xuño de 2023, seguíronse os trámites da fase intermedia previstos no artigo 42 da Lei 16/2010.

De conformidade co artigo 41.5 da mesma norma, consta certificado emitido o 1 de marzo de 2023 pola directora da Área de Administración dixital na Amtega, no que se dá conta de que no período comprendido entre o 6/06/2023 e o 26/06/2023 (en cumprimento do disposto no artigo 9 da Lei 1/2016, do 18 de xaneiro, de transparencia e bo goberno) se expuxo publicamente no portal de Transparencia e Goberno Aberto o texto íntegro do proxecto de orde, recibíndose oito achegas/ suxestións.

Así, na tramitación do proxecto solicitouse informe á Secretaría Xeral da Igualdade e á Dirección Xeral de Planificación e Orzamentos, que se emitiron o 19 de xuño de 2023 e o 7 de xuño de 2023, respectivamente

En cumprimento do disposto no artigo 42.1 da Lei 16/2010, remitiuse ás demais consellerías da Xunta de Galicia o proxecto de orde para os efectos da emisión do informe que puidera esixir a lexislación vixente. Se recibiu unha observación do Instituto de Estudos do Territorio.

Inclúese no expediente certificado emitido pola secretaria da Mesa Sectorial Docente non Universitaria asinado o 5 de xullo de 2023, no que se fai constar que o proxecto de decreto foi tratado na sesión da Mesa Sectorial celebrada o día 13 de xuño de 2023.

Constan tamén memorias da Dirección Xeral de Ordenación e Innovación Educativa, de datas 31 de maio de 2023, 4 de xullo de 2023 e 14 de xuño de 2023, sobre os informes e ditames emitidos polos distintos órganos que con carácter preceptivo informaron o proxecto , sobre as alegacións do Instituto de Estudos do Territorio, sobre as achegas recibidas nos trámites de consulta pública previa e de exposición no Portal de Transparencia.

A Asesoría Xurídica Xeral emitiu informe o 8 de agosto de 2023.





De conformidade co artigo 43.2 da Lei 16/2010, de 17 de decembro, de organización e funcionamento da Administración xeral e do sector público de Galicia, por considerar que se axusta á legalidade vixente, informo favorablemente o proxecto de orde polo que se amplia a relación de materias optativas do bacharelato e se establece o seu currículo.

Santiago de Compostela, data da súa sinatura dixital

O secretario xeral técnico
Manuel Vila López

